


საქართველოს უზენაესი სასამართლოს მოსამართლის თანამდებობაზე ასარჩევად  
 საქართველოს პარლამენტისათვის წარსადგენი სამოსამართლო გამოცდილების არმქონე  
 მოსამართლეობის კანდიდატის შეფასების ფორმა

თამარ ალფაიძის  
 მოსამართლეობის კანდიდატის ----- შეფასების შედეგი:

| მოსამართლეობის კანდიდატის შეფასება კეთილსინდისიერების კრიტერიუმის მიხედვით |                                     |                  |
|--|-------------------------------------|------------------|
| მოსამართლეობის კანდიდატი არ აკმაყოფილებს კეთილსინდისიერების კრიტერიუმს     | <input type="checkbox"/>            |                  |
| მოსამართლეობის კანდიდატი აკმაყოფილებს კეთილსინდისიერების კრიტერიუმს        | <input checked="" type="checkbox"/> |                  |
| მოსამართლეობის კანდიდატი სრულად აკმაყოფილებს კეთილსინდისიერების კრიტერიუმს | <input type="checkbox"/>            |                  |
| მოსამართლეობის კანდიდატის შეფასება კომპეტენტურობის კრიტერიუმის მიხედვით    |                                     |                  |
| კრიტერიუმი   | მიღებული ქულა                       | მაქსიმალური ქულა |
| სამართლის ნორმების ცოდნა   | 18                                  | 25               |
| სამართლებრივი დასაბუთების უნარი და კომპეტენცია                             | 21                                  | 25               |
| წერისა და ზეპირი კომუნიკაციის უნარი  | 18                                  | 20               |
| პროფესიული თვისებები   | 14                                  | 15               |
| აკადემიური მიღწევები და პროფესიული წვრთნა                                  | 9                                   | 10               |
| პროფესიული აქტივობა  | 5                                   | 5                |
| <b>ქულათა ჯამი</b>   | <b>85</b>                           | <b>100</b>       |

სახელი, გვარი : ნიკოლოზ მარსაგიშვილი

თარიღი : 28/05-2021 წ/წ





საქართველოს იუსტიციის უმაღლესი საბჭოს წევრი ნიკოლოზ მარსაგიშვილი

საქართველოს უზენაესი სასამართლოს მოსამართლის შესარჩევ კონკურსში მონაწილე კანდიდატის

თამარ ალფაიძის შეფასების დასაბუთება

საქართველოს უზენაესი სასამართლოს მოსამართლის შესარჩევ კონკურსში მონაწილე კანდიდატის თამარ ალფაიძის შეფასების დასაბუთების შედეგის პროცესში ვიხელმძღვანელებ „საერთო სასამართლოების შესახებ“ საქართველოს ორგანული კანონის 34<sup>1</sup> მუხლის მე-11 პუნქტით დადგენილი წესით.

| მოსამართლეობის კანდიდატის შეფასება კეთილსინდისიერების კრიტერიუმის მიხედვით |                                     | კომენტარი   |
|--|-------------------------------------|---|
| მოსამართლეობის კანდიდატი არ აკმაყოფილებს კეთილსინდისიერების კრიტერიუმს     | <input type="checkbox"/>            | კანდიდატი თამარ ალფაიძე არის თავდაჯერებული, კორექტული და თავაზიანი. ასევე, მას სწორად აქვს გაანალიზებული მისთვის დაკისრებული პასუხისმგებლობა და ფინანსურ თუ სხვა სახის ვალდებულებებს (ქონებრივი დეკლარაციის შევსება, ბანკის ან სხვა ვალის გადახდა, საგზაო მოძრაობის წესების დარღვევისათვის ჯარიმის გადახდა და სხვ.) ასრულებს ჯეროვნად. ამასთან, კანდიდატის პირად თვისებებს და პროფესიულ საქმიანობას გამოკითხული რეკომენდატორები და მასთან სამსახურებრივ თუ პირად ურთიერთობაში მყოფი პირები აფასებენ |
| მოსამართლეობის კანდიდატი აკმაყოფილებს კეთილსინდისიერების კრიტერიუმს        | <input checked="" type="checkbox"/> |   |
| მოსამართლეობის კანდიდატი სრულად აკმაყოფილებს კეთილსინდისიერების კრიტერიუმს | <input type="checkbox"/>            |   |

|   |               |                  |   |
|---|---------------|------------------|---|
|   |               |                  | დადებითად. თუმცა, უნდა ითქვას, ისიც, რომ თამარ ალფაიძეს რამოდენიმეჯერ დაკისრებული აქვს დისციპლინური სახდელი.  |
| მოსამართლეობის კანდიდატის შეფასება კომპეტენტურობის კრიტერიუმის მიხედვით |               |                  | კომენტარი   |
| კრიტერიუმი  | მიღებული ქულა | მაქსიმალური ქულა |   |
| სამართლის ნორმების ცოდნა  | 18            | 25               | თამარ ალფაიძესთან გამართული საჯარო მოსმენის შედეგად, მხოლოდ იმის თქმა არის შესაძლებელი, რომ იგი მეტნაკლებად იცნობს საქართველოს კონსტიტუციის ნორმებს.  |
| სამართლებრივი დასაბუთების უნარი და კომპეტენცია                          | 21            | 25               | კანდიდატს აქვს სპეციალობით მუშაობის ხანგრძლივი გამოცდილება და გამოირჩევა ანალიტიკური აზროვნების უნარით. აღსანიშნავია, რომ იგი ამჟამად არის საქართველოს ეროვნული უნივერსიტეტის პროფესორი.  |
| წერისა და ზეპირი კომუნიკაციის უნარი                                     | 18            | 20               | თამარ ალფაიძე გამოირჩევა გამართული მეტყველებითა და სხვისი აზრის მოთმინებით მოსმენის უნარით. ამასთან, იგი ღიად და თავისუფლად გამოხატავს მის პოზიციასა და შეხედულებებს. თუმცა, უნდა აღინიშნოს ისიც, რომ საჯარო მოსმენაზე კანდიდატს საკმაოდ ეტყობოდა მღელვარება, რის გამოც ხშირად უჭირდა მისი პოზიციის ნათლად და გასაგებად გადმოცემა. თამარ ალფაიძის წერის უნარს რაც შეეხება, მის მიერ წარმოდგენილი სამართლებრივი დოკუმენტების <sup>1</sup> შესწავლის საფუძველზე შესაძლებელია ითქვას, რომ კანდიდატს აქვს სათანადო წერის უნარი. |

<sup>1</sup> პუბლიკაციები: ჰუმანური სამართალი; სამართლის ჰუმანური პრინციპები“, „ინტერნეტი და მისი სამართლებრივი რეგულირება“, „მასმედია და სახელმწიფო ხელისუფლება“.

|   |   |     |  |
|---|---|-----|--|
|   |   |     | კერძოდ, იგი აზრს გადმოსცემს ნათლად, ლოგიკურად და თანმიმდევრულად. ტექსტი არის გამართული და დაინტერესებული პირებისათვის არ არის რთულად აღსაქმელი.  |
| პროფესიული თვისებები                      | 14  | 15  | კანდიდატი არის მიზანდასახული, შრომისმოყვარე და გამოირჩევა დამოუკიდებელი აზროვნების უნარით.   |
| აკადემიური მიღწევები და პროფესიული წვრთნა | 9   | 10  | თამარ ალფაიძე არის ღია სიახლეების მიმართ და აქვს ახალი ცოდნისა და უნარების შეძენის ინტერესი. აღსანიშნავია, რომ მას მონაწილეობა აქვს მიღებული სხვადასხვა საერთაშორისო თუ ადგილობრივ ტრენინგსა და სასწავლო კურსში.         |
| პროფესიული აქტივობა                       | 5   | 5   | თამარ ალფაიძის პროფესიულ აქტივობასთან დაკავშირებით უნდა აღინიშნოს, რომ იგი საქართველოს ეროვნულ უნივერსიტეტში ეწევა პედაგოგიურ საქმიანობას. ამასთან, კანდიდატი არის სამართლებრივი სტატიებისა და წიგნის ავტორი/თანაავტორი. |
| ქულათა ჯამი                               | 85  | 100 |  |
| დასაბუთება                                | <p><b>უზენაესი სასამართლოს მოსამართლეობის კანდიდატის შეფასება კეთილსინდისიერების კრიტერიუმის მახასიათებლების მიხედვით</b></p> <p>„საერთო სასამართლოების შესახებ“ საქართველოს ორგანული კანონის თანახმად, იმის დასადგენად თუ რამდენად აკმაყოფილებს კანდიდატი თამარ ალფაიძე კეთილსინდისიერების კრიტერიუმს, წინამდებარე დასკვნაში წარმოდგენილი და გაანალიზებულია მისი შეფასება აღნიშნული კრიტერიუმის თითოეულ მახასიათებელთან მიმართებით. კერძოდ, პიროვნული კეთილსინდისიერება და პროფესიული სინდისი; დამოუკიდებლობა, მიუკერძოებლობა და სამართლიანობა; პიროვნული და პროფესიული ქცევა; პიროვნული და პროფესიული რეპუტაცია; ფინანსური ვალდებულება.</p> <p>აღსანიშნავია, რომ კეთილსინდისიერების კრიტერიუმით თამარ ალფაიძის შეფასება</p> |     |  |

დაეყრდნო კანდიდატების შესახებ მოძიებულ ინფორმაციას, რა დროსაც სხვადასხვა უწყებიდან მოხდა მის შესახებ შემდეგი სახის ინფორმაციის გამოთხოვა: საქართველოს შინაგან საქმეთა სამინისტროდან მონაცემები ადმინისტრაციული სამართალდარღვევების შესახებ, სს „კრედიტინფო საქართველოდან“ სრული პერსონალური საკრედიტო ინფორმაცია, საქართველოს ფინანსთა სამინისტროს შემოსავლების სამსახურიდან ცნობა შემოსავლების შესახებ, საჯარო სამსახურის ბიუროდან ქონებრივი მდგომარეობის დეკლარაცია, კანდიდატის სამუშაო ადგილიდან ინფორმაცია დისციპლინური სამართალწარმოების შესახებ, თამარ ალფაიძის დახასიათების მიზნით მასთან სამსახურებრივ და პირად ურთიერთობაში მყოფი პირებისგან შევსებული სპეციალური ფორმის რეკომენდაციები, კითხვარები და სხვ. ამასთან, მნიშვნელოვანია, აღინიშნოს ისიც, რომ თამარ ალფაიძის შეფასებისას გათვალისწინებულ იქნა მის მიერ განაცხადის შევსებისას მითითებული ინფორმაცია და საჯარო მოსმენისას კანდიდატის მხრიდან გამოვლენილი სხვადასხვა თვისებები, მახასიათებლები და სხვ.

ზემოაღნიშნულზე დაყრდნობით, კანდიდატთან დაკავშირებით პიროვნული კეთილსინდისიერებისა და პროფესიული სინდისის მახასიათებლის თაობაზე შესაძლებელია ითქვას, რომ თამარ ალფაიძის პირად თვისებებს რეკომენდატორები და მასთან პირად თუ პროფესიულ ურთიერთობაში მყოფი პირები აფასებენ დადებითად. რეკომენდატორები აცხადებენ, იმასაც რომ თამარ ალფაიძე არის კეთილსინდისიერი, შრომისმოყვარე, გაწონასწორებული და პროფესიული პრინციპებისადმი ერთგული. ამასთან, თამარ ალფაიძემ საჯარო მოსმენაზე დატოვა კორექტული და ზრდილობიანი პიროვნების შთაბეჭდილება. მნიშვნელოვანია, რომ კანდიდატი ფინანსურ ან სხვა ხასიათის ვალდებულებებს ასრულებს ჯეროვნად. კერძოდ, იგი დროულად იხდის საგზაო მოძრაობის წესების დარღვევისათვის დაკისრებულ ჯარიმებს (თუმცა, 2017 წლის 8 დეკემბრიდან 2020 წლის 8 დეკემბრის ჩათვლით, საქართველოს შინაგან საქმეთა სამინისტროს საინფორმაციო-ანალიტიკური დეპარტამენტის ინფორმაციით, კანდიდატის მხრიდან გამოვლინდა 23 ადმინისტრაციული სამართალდარღვევის ჩადენის ფაქტი), კარგად ასრულებს ფინანსურ ვალდებულებებს, აქვს დადებითი საკრედიტო ისტორია, მის მიერ ქონებრივი დეკლარაციის შევსებისას დარღვევას ადგილი არ ჰქონია და სხვ. თუმცა, სამსახურებრივი მოვალეობების ჯეროვნად შესრულების საკითხთან დაკავშირებით, საქართველოს ეროვნული უნივერსიტეტის მიერ მოწოდებული ინფორმაციის თანახმად, უნდა აღინიშნოს, რომ კანდიდატს 4-ჯერ აქვს ჩადენილი დისციპლინური გადაცდომა, რაც დაკავშირებული იყო მისი მხრიდან სამსახურებრივი მოვალეობების არაჯეროვნად შესრულებასთან (დეტალური ინფორმაცია თამარ ალფაიძის მიერ ჩადენილი დისციპლინური გადაცდომების შესახებ, წარმოდენილია პიროვნული და პროფესიული ქცევის მახასიათებლის

საფუძველზე კანდიდატის შეფასებისას). ეს ყველაფერი კი მისი მხრიდან სამსახურებრივი მოვალეობების ჯეროვნად შესრულების კუთხით აჩენს გარკვეულ კითხვის ნიშნებს.

დამოუკიდებლობის, მიუკერძოებლობისა და სამართლიანობის მახასიათებლის თაობაზე უნდა ითქვას, რომ თამარ ალფაიძის დახასიათებისას გამოკითხული რეკომენდატორები აღნიშნავენ, რომ იგი არის დამოუკიდებელი, მიუკერძოებელი, სამართლიანი და გამოირჩევა თავისუფალი აზროვნების უნარით. აღსანიშნავია, რომ კანდიდატი საჯარო მოსმენისას ზოგად თუ სამართლებრივ საკითხებზე მსჯელობისას ამჟღავნებდა პრინციპულობას, თავდაჯერებულობას, პიროვნულ სიმტკიცეს, შეუვალობას, ზეგავლენის მიმართ მედეგობასა და გადაწყვეტილების დამოუკიდებლად მიღების უნარს. თამარ ალფაიძის პოლიტიკურ ან სხვა ნიშნით მიუკერძოებლობასთან დაკავშირებით კი უნდა ითქვას, რომ მოძიებული ინფორმაციის თანახმად, კანდიდატი არ ყოფილა არცერთი პოლიტიკური პარტიის წევრი/მხარდამჭერი, შემომწირველი, თუმცა იგი 2019 წელს მონაწილეობდა საქართველოს პარლამენტის შუალედურ არჩევნებში მთაწმინდის ოლქში როგორ საინიციატივო ჯგუფის მიერ წარდგენილი დამოუკიდებელი კანდიდატი. ამასთან, საჯარო მოსმენაზე მისი მხრიდან არ გამოთქმულა ისეთი მოსაზრებები, რაც გააჩენდა ეჭვს მის პოლიტიკურ ან სხვა ნიშნით მიუკერძოებლობაში.

პიროვნული და პროფესიული ქცევის მახასიათებელთან დაკავშირებით მოძიებული ინფორმაციის საფუძველზე უნდა აღინიშნოს, რომ კანდიდატის წინააღმდეგ სისხლისსამართლებრივი წარმოება არ დაწყებულა და იგი დაზარალებულად ცნობილი არ ყოფილა. ამასთან, თამარ ალფაიძისათვის დისციპლინური პასუხისმგებლობის დაკისრების საკითხს რაც შეეხება, ამის თაობაზე, უნდა ითქვას, რომ კანდიდატის მიმართ სეუ-მ ჩადენილი დისციპლინური გადაცდომისთვის პასუხისმგებლობის ზომად განსაზღვრა: რექტორის 2018 წლის 16 ნოემბრის ბრძანებით საგამოცდო საკითხების უნივერსიტეტის მიერ დადგენილ ვადებში წარმოუდგენლობის გამო - შენიშვნა, რექტორის 2019 წლის 24 აპრილის ბრძანებით საგამოცდო საკითხების უნივერსიტეტის მიერ დადგენილ ვადებში წარმოუდგენლობის გამო (მეორე შემთხვევა) - ერთი სალექციო მეცადინეობის ანაზღაურების ექვივალენტური ხელფასის დაკავება, რექტორის 2019 წლის 24 აპრილის ბრძანებით მარტი-აპრილის თვეებში ლექციებზე/მეცადინეობებზე დაგვიანებების გამო - შენიშვნა და რექტორის 2019 წლის 15 ოქტომბრის ბრძანებით 2018-2019 სასწავლო წლის გაზაფხულის სემესტრში სტუდენტთა დასკვნითი გამოცდის შეფასების შეცვლის გამო - გაფრთხილება. სასამართლოში წარმართულ დავებში მის მხარედ მონაწილეობასთან დაკავშირებით კი შესაძლებელია აღინიშნოს, რომ საქართველოს იუსტიციის უმაღლესი საბჭოს სასამართლო მენეჯმენტის დეპარტამენტის ინფორმაციის თანახმად,

კანდიდატი მოპასუხედ მონაწილეობდა ერთ სამოქალაქო საქმეში. დავის საგანს წარმოადგენდა თანხის გადახდის დაკისრება. თუმცა, თბილისის საქალაქო სასამართლოს 2012 წლის 31 აგვისტოს განჩინებით სარჩელი დატოვებულ იქნა განუხილველად. მნიშვნელოვანია, რომ გამოკითხული რეკომენდატორები პიროვნული და პროფესიული ქცევის მახასიათებლით თამარ ალფაიძის შეფასებისას უთითებენ, რომ იგი კოლეგებთან და სხვა პირებთან ურთიერთობაში გამოირჩევა კორექტულობით. საჯარო მოსმენაზეც მან დატოვა ზრდილობიანი და თავდაჭერილი პიროვნების შთაბეჭდილება, თუმცა, კანდიდატს საკმაოდ ეტყობოდა მღელვარება და უჭირდა საკუთარი ემოციების მართვა.

პიროვნულ და პროფესიულ რეპუტაციის მახასიათებელს რაც შეეხება თამარ ალფაიძის პიროვნულ თვისებებს და მის პროფესიულ მიღწევებს რეკომენდატორები და გამოკითხული პირები აფასებენ დადებითად. ამასთან, რეკომენდატორები უთითებენ, რომ კანდიდატი გამოირჩევა მაღალი რეპუტაციით. საქართველოს იუსტიციის უმაღლესი საბჭოს საზოგადოებასთან და მედიასთან ურთიერთობის მენეჯერის მიერ მოძიებული ინფორმაციის თანახმად, თამარ ალფაიძის შესახებ ინტერნეტ სივრცეში ხელმისაწვდომია სხვადასხვა სახის ინფორმაცია, მათ შორის, მისი პოლიტიკური საქმიანობის, ასევე სემეკის, კომუნიკაციების მარეგულირებელი კომისიისა და საზოგადოებრივი მაუწყებლის სამეურვეო საბჭოში მისი კანდიდატობის შესახებ. იურიდიულ წრეებთან ურთიერთობის ხასიათთან და ხარისხთან დაკავშირებით კი მოძიებული ინფორმაციის საფუძველზე შესაძლებელია ითქვას, რომ თამარ ალფაიძეს მონაწილეობა აქვს მიღებული სხვადასხვა ტრენინგებში, სასწავლო კურსებში და ეწევა პედაგოგიურ საქმიანობას.

ფინანსური ვალდებულებების მახასიათებელთან დაკავშირებით, მოძიებული ინფორმაციის თანახმად შესაძლებელია აღინიშნოს, რომ თამარ ალფაიძეს აქვს დადებითი საკრედიტო ისტორია და მას სახელმწიფო ბიუჯეტის მიმართ დავალიანება არ ერიცხება. იგი მეწარმეთა და არასამეწარმეო იურიდიულ პირთა რეესტრში რეგისტრირებული არ არის. ამრიგად, კანდიდატის ფინანსური ვალდებულებების შემოწმების შედეგად, გამოიკვეთა, რომ არ არსებობს მისი ქონებრივი ინტერესების მართლმსაჯულების ინტერესებთან დაპირისპირების საფუძველი, რამაც შესაძლოა შემდგომში საფრთხის ქვეშ დააყენოს მოსამართლის მიუკერძოებლობა.

ამრიგად, დასკვნის სახით, მოძიებული ინფორმაციისა და საჯარო მოსმენაზე კანდიდატის მიერ გამოვლენილი თვისებებისა და მახასიათებლების შეფასებისა და გაანალიზების შედეგად, მიმაჩნია, რომ იგი აკმაყოფილებს კეთილსინდისიერების კრიტერიუმს.

**უზენაესი სასამართლოს მოსამართლეობის კანდიდატის შეფასება კომპეტენტურობის**

## კრიტიკუმი მახასიათებლების მიხედვით

„საერთო სასამართლოების შესახებ“ საქართველოს ორგანული კანონის თანახმად, კომპეტენტურობის კრიტერიუმის საფუძველზე კანდიდატ თამარ ალფაიძის შეფასებისას მხედველობაში იქნა მიღებული აღნიშნული კრიტერიუმის თითოეული მახასიათებელი. კერძოდ, სამართლებრივი ნორმების ცოდნა; სამართლებრივი დასაბუთების უნარი და კომპეტენცია; წერისა და ზეპირი კომუნიკაციის უნარი; პროფესიული თვისებები; აკადემიური მიღწევები და პროფესიული წვრთნა; პროფესიული აქტივობა. აღსანიშნავია, რომ კომპეტენტურობის კრიტერიუმით კანდიდატის შეფასება დაეყრდნო კანდიდატის შესახებ მოძიებულ ინფორმაციას, მათ შორის, მის მიერ წარმოდგენილ სამართლებრივ დოკუმენტებს და საჯარო მოსმენის შედეგად შექმნილ შთაბეჭდილებას.

კანდიდატის მიერ სამართლებრივი ნორმების ცოდნასთან დაკავშირებით თამარ ალფაიძესთან გამართული საჯარო მოსმენის შედეგად, მხოლოდ იმის თქმა არის შესაძლებელი რომ იგი მეტნაკლებად იცნობს საქართველოს კონსტიტუციის ნორმებს.

იუსტიციის უმაღლესი საბჭოს თითოეული წევრის მიერ კანდიდატების შესახებ მოძიებული ინფორმაციის შესწავლის შემდეგ, 2021 წლის 26 აპრილს თამარ ალფაიძესთან გაიმართა საჯარო მოსმენა.<sup>2</sup> საჯარო მოსმენისას კანდიდატს იუსტიციის უმაღლესი საბჭოს წევრებმა დაუსვეს არაერთი სამართლებრივი და ზოგადი ხასიათის შეკითხვა. უნდა აღინიშნოს, რომ იგი იყო საკმაოდ კორექტული. ამასთან, თამარ ალფაიძე ღიად და თავისუფლად გამოხატავდა მის პოზიციასა და შეხედულებებს. მართალია იყო თავდაჯერებული, თუმცა, მას არაერთ დასმულ შეკითხვაზე გაუჭირდა პასუხის გაცემა. კანდიდატს საკმაოდ ეტყობოდა მღელვარება, რის გამოც იგი ვერ ახერხებდა მისი შეხედულებების ნათლად და დამაჯერებლად გადმოცემას. ამასთან, სხვადასხვა სამართლებრივ საკითხზე საუბრისას კანდიდატს გაუჭირდა სიღრმისეული, არგუმენტირებული და დასაბუთებული სამართლებრივი მსჯელობის განვითარება.

თამარ ალფაიძის სამართლებრივი დასაბუთების უნარის და კომპეტენციის შესახებ შესაძლებელია ითქვას, რომ კანდიდატს აქვს ხანგრძლივი პროფესიული გამოცდილება. იგი ამჟამად არის საქართველოს ეროვნული უნივერსიტეტის პროფესორი. ამასთან, იგი გამოირჩევა ანალიტიკური აზროვნების უნარით.

კანდიდატის წერისა და ზეპირი კომუნიკაციის უნარს რაც შეეხება, ამ კუთხით უნდა აღინიშნოს, რომ თამარ ალფაიძე გამოირჩევა გამართული მეტყველებისა და სხვისი აზრის მოთმინებით მოსმენის უნარით. ამასთან, როგორც უკვე აღვნიშნე იგი ღიად და

<sup>2</sup> იხ. თამარ ალფაიძესთან გამართული საჯარო მოსმენის ვიდეოჩანაწერი: <https://www.youtube.com/watch?v=AY-0eu3S1Pc>



თავისუფლად გამოხატავს მის პოზიციასა და შეხედულებებს. თუმცა, საჯარო მოსმენაზე მას საკმაოდ ეტყობოდა მღელვარება, რის გამოც ხშირად უჭირდა საკუთარი შეხედულებების ნათლად და გასაგებად გადმოცემა. თამარ ალფაიძის წერის უნარს რაც შეეხება, მის მიერ წარმოდგენილი სამართლებრივი დოკუმენტების<sup>3</sup> შესწავლის საფუძველზე შესაძლებელია ითქვას, რომ კანდიდატს აქვს სათანადო წერის უნარი. კერძოდ, იგი აზრს გადმოსცემს ნათლად, ლოგიკურად და თანმიმდევრულად. ტექსტი არის გამართული და დაინტერესებული პირებისათვის არ არის რთულად აღსაქმელი. მნიშვნელოვანია, რომ მასში რაიმე თვალსაჩინო გრამატიკული ხასიათის შეცდომა არ გამოვლენილა.

*პროფესიული თვისებების მახასიათებელთან* დაკავშირებით მოძიებული ინფორმაციის საფუძველზე შესაძლებელია აღინიშნოს, რომ თამარ ალფაიძე გამოირჩევა მიზანდასახულობით, პუნქტუალურობითა და დამოუკიდებელი აზროვნების უნარით.

თამარ ალფაიძის *პროფესიული წვრთნის, აკადემიური მიღწევებისა და პროფესიული აქტივობის შესახებ* შესაძლებელია ითქვას, რომ კანდიდატი არის ღია სიახლეების მიმართ და გააჩნია ახალი ცოდნის და უნარების შეძენის ინტერესი. მას მონაწილეობა აქვს მიღებული სხვადასხვა საერთაშორისო თუ ადგილობრივ ტრენინგსა და სასწავლო კურსში. ამასთან, იგი საქართველოს ეროვნულ უნივერსიტეტში ეწევა პედაგოგიურ საქმიანობას და წარმოადგენს შემდეგი სალექციო კურსების ავტორს: სამართალმცოდნეობის შესავალი, საკანონმდებლო ტექნიკა, მედია სამართალი და თვით რეგულირება, კონსტიტუციური სამართალი, ინფორმაციული უსაფრთხოება და კიბერ უსაფრთხოება. უნდა ითქვას ისიც, რომ თამარ ალფაიძე არის სამართლებრივი სტატიებისა და წიგნის ავტორი/თანაავტორი. კანდიდატი განაცხადში უთითებს იმასაც, რომ მისი აკადემიური ნაშრომი - „სამართალმცოდნეობის შესავალი“ იურიდიული მეცნიერების დარგში წარდგენილია საქართველოს ეროვნული პრემიის მოსაპოვებლად.

### **შეჯამება**

ყოველივე ზემოაღნიშნულის გათვალისწინებით, კანდიდატ თამარ ალფაიძესთან დაკავშირებით შესაძლებელია, ითქვას რომ იგი აკმაყოფილებს კეთილსინდისიერების კრიტერიუმს. ამასთან, კომპეტენტურობის კრიტერიუმის თითოეულ

<sup>3</sup> პუბლიკაციები: ჰუმანური სამართალი; სამართლის ჰუმანური პრინციპები“, „ინტერნეტი და მისი სამართლებრივი რეგულირება“, „მასმედია და სახელმწიფო ხელისუფლება“.

მახასიათებელთან მიმართებით კანდიდატის შეფასებისას გათვალისწინებულ იქნა მისი ცოდნა, კომპეტენცია, გამოცდილება, პროფესიული თვისებები, უნარ-ჩვევები და სხვა მნიშვნელოვანი მახასიათებლები. აღნიშნული ინფორმაციის შეჯერებისა და შეფასების საფუძველზე კი დადგინდა, რომ მის მიერ დაგროვილ ქულათა ჯამი მაქსიმალური 100 ქულიდან შეადგენს 85 ქულას. ამრიგად, ვინაიდან უზენაესი სასამართლო არის მართლმსაჯულების განხორციელების უმაღლესი და საბოლოო ინსტანციის საკასაციო სასამართლო და იგი ერთგვარად წარმოადგენს დოქტრინალურ სასამართლოს, რადგან დიდ როლს ასრულებს სამართლის ნორმის განმარტებისა და ერთგვაროვანი სასამართლო პრაქტიკის ჩამოყალიბებაში, აღნიშნული სასამართლოს მოსამართლეობა დიდ პასუხისმგებლობასთან და სირთულეებთან არის დაკავშირებული. შესაბამისად, მიმაჩნია, რომ კანდიდატი ამ ეტაპზე არ არის მზად დაიკავოს აღნიშნული თანამდებობა.

სახელი, გვარი: ნიკოლოზ მარსაგიშვილი

ხელმოწერა:

თარიღი:

28/04-2021

